

國朝畿輔詩傳

國朝畿輔詩傳卷二

長洲陶 樸覺薌輯 天津梅成棟樹君校

魏裔介

裔介字石生號貞庵又號崑林柏鄉人順治三年進士歷官秘書院大學士諡文毅祀賢良有兼濟堂集二十卷

四庫全書提要兼濟堂集二十卷魏裔介撰裔介有孝經註義已著錄是編奏疏三卷序六卷書牘二卷傳誌二卷祭文論二卷雜著二卷樂府古今體詩三卷附年譜一卷其平生著述刻於江南者有兼濟堂集十四卷刻于荆南者有兼濟堂集二十四卷刻於京師者有文選二集上下二編崑林小品上下二編崑林外集一編奏疏尺牘存餘七卷其刻於林下者有文選十

卷嶼航近草五卷詩集七卷榜林三筆五卷此

集乃詹明章哀輯諸本簡汰繁冗合刊爲一編

者也裔介立朝頗著風節其所陳奏多關國家

大體詩文醇雅亦不失爲儒者之言雖不以詞

章名一世而以介於國

初作者之閒固無忝焉

歲輔通志裔介授給事中有糾邪黨去冗員舉

經筵防叢脞杜侵欺開言路諸疏改吏科上褒

錄幽忠疏又因星變上疏十餘皆切時政演默

未靖密陳用兵機宜多見採錄條陳時事

疏無虛日贊襄機務深合宸衷

彭紹升測海集順治五年石生官工科給事中

上疏請及時講學舉經筵以隆治本又言上下

之情未通滿漢之氣中閒綱紀弛法度壞宜

召對羣臣虛心咨訪以求救時實政並令史官

記註傳信萬世俱報聞轉吏科給事中九年

疏請定視朝之制始詔以逢五一視朝著爲

令先後累疏請恤災荒寬逃人連坐之禁錄建

言得罪諸臣增官吏祿俸停不急之工罷侈靡

無益之費因言天下未平率由徵求太急刑罰

太繁宜廣開言路通民情尙寬大平易之治勿
以刻薄瑣碎傷治體其論事縝切多此類也十
四年授左都御史詔獎其直加太子太保一
召至中和殿諭曰惟朕知爾還矣十八年以漁
薊州上疏諫報曰朕不日卽還矣十八年以漁
閩用兵加天下練餉五百萬石生請徵康熙元
軍需足用卽止詔除已派外並停征康熙元
年雲南平上疏請撤滿州兵還駐荆襄扼天下
形勝消姦宄之萌爲部議所沮復請命湖廣
總督自武昌移駐荊州從之及吳三桂反湖南
州縣俱陷卒不得過荊州人以是服石生之先
慮也三年拜保和殿大學士十年以疾乞休家
居十六

年卒

吳偉業序柏鄉魏公乘鴻駿魁傑之才遭逢
聖朝迴翔禁近世祖章皇帝與起右文
招延俊茂文學侍從之臣無不揆藻摘華對揚
躋憲府密勿論思紀綱庶政封章數十上皆關
天下國家大計蓋非

能盡用公之言以興致太平而非公之才與公
之學亦不能輔導以成至治今上御極
公入居政府於時海內晏安從容於黃扉綸閣
之間得以留心述作公又遠於濂洛關閩之旨
以其餘閒作爲詩歌則又能龍挫萬物匠心獨
妙至於悲鼎湖之莫逮痛予期之云亡其忠
氣節於君父友朋之間尤惓惓乎三致意焉
曹禾序先生首擢制科爲翰林爲諫議既而掌
臺綱掌銓政爰立作相翊佐我風慕化先生之
啟土宇政教所迄窮陬海濱嚮德之餘事之
文章當代仰爲師表先生則以爲道德之餘事
功之末久而不肯出也蓋先生深於濂洛關閩
之旨不欲以文章名世而不知先生之文先生
之道德也先生之文先生之聖主而垂治統復
德事功輔而開文運則先生之生於此時
乃天所以啟一代文明之盛誠非偶然也
阮葵生茶餘客話王漁洋云李高陽之於曹頌
嘉不梁正定之於汪蛟門懋麟魏柏鄉之於董

秀才文友以益服膺贊歎不啻若自其口出諸
君皆及門士而文友與柏鄉未嘗識而是之謂
真知已

紅豆樹館詩話文毅潛心理學著述十餘種皆
宗程朱詩清和雅飭具有根柢嘗有句云道以
遲能重書因悟轉疑
可知其胸中所得矣

觀滄海

滄海非東崑崙非西倬彼天漢元氣混齊蓬萊三山是
耶非耶銀臺金闕侯不乘槎潤色萬物震蕩九土沐日
浴月天樞地戶幸甚至哉歌以詠志

甲午春流民南走如蟻有夫婦至滹沱河欲渡舟
子索值無以應遂並其子女赴河死余聞而哀

之作投河歎

望望棄故里蹙蹙度層阿積雪愁未盡寒雨漫長坡豈
不念鄉閭命也嬰禍羅行期計匝月遙望見滹沱滹沱
何澎湃春風增白波對此心怵惕四顧空延俄飢夫前
致詞亦欲渡此河離鄉日已遠無食一身多況今襤褸
婦黃口一肩駝但獲渡濟去冥報豈有他舟子瞪目視
笑爲船上歌飢夫語飢婦我當葬蛟鼉爾挾懷中雛丐
食行逶迤飢婦更無語長號赴奔渦飢夫投其雛捐命
同飛蛾是時天地黯慘色起嵯峨飢民岸林立哽咽共
跌蹉哀哉今之民而不如鴛鴦

哀盜

解羽絛朱纓長弓響鳴鏑倭刀燦若雪袒肩挂裘褐跨
馬出都門直渡盧溝水翻身射皂鵬飛血濺象弭蹀躞
縱橫馳側身若蛟螭行人皆辟易長跪獻金貲醉眼方
朦朧繫縛後車屬弓刀不及發狼藉司寇獄豈乏鐵衣
朋跼踖不敢贖

春日感懷

種樹以爲林結茅以成屋家有負郭田聊足供饘粥春
風樹若黛秋雨山如沐二三老農人戴笠牧黃犢此事
樂有餘此生甘鹿鹿虛名煎膏火途窮見車覆憂來每

無方顛毛種種禿座右金人銘朝夕事三覆簞鏗眞吾
師敬慎以爲轂

范丹釜生塵曲逆家落魄張陳與蕭朱衡纘爭強弱所
以朱公叔絕交甘寂寞人生重友朋明信以爲約鬱鬱
青松色歲寒終不削愧彼桃李花方春競絢綽余家世
燕趙由來恥浮薄策馬古鄆城遙望邯鄲郭桓桓信陵
君仗義資大畧好與屠沽游孤寒欣有託歎息斯人去
仁風不可作

少伯霸越後五湖煙水清子房學辟穀欲從赤松行古
之賢達人脫屣視公卿而我竟何事高臥古燕京寒威

日凜冽三月及清明春風度楊柳百卉始向榮啾啾榆
枋間鳥雀自相爭何如空山下萋萋芳草生桃花蔽夾
岸泠泠澗水鳴念此長太息流涕濡冠纓歸與會有時
遙憶古人情

猶龍與鳬盟我輩論文早王孟如復生晨夕相傾倒晚
得巢壑子浩歌天地老仗劍走西秦尋源崑崙道不見
古時人唯見連天草長鋏復歸來黃鵠翔蒼昊莫効墮
陽雁飲啄謀梁稻庶幾共夷猶廣牟山色好

巢壑子殷
岳也鷄澤

人

芒屨沿溪行西至白雲院白雲自去來不見古人面松

陰羽士家晨爨炊香飯曲徑轉幽篁綸巾雜丹篆對此
默無言玉液思修鍊當年長春子萬里走雪山諄諄不
嗜殺沙漠霽龍顏乃知古仙術仍欲濟時艱安得戰伐
息蒼岫閉松關

古風

農家有真樂歸田始得知一犁耕初雨五月織新絲牆
頭梨棗熟烏雀莫令窺圃內蔬菜長灌溉不失期秋成
但得半豈復愁朝饑雖曰官租急幸免戍邊陲晚黍况
已茂新釀日可期入門喚婦子客至速爲炊

讀杜子美詩

古作多蔚跂茲編實云聖盟手展縹帙肅然起恭敬世
人誦公詩擷芳資游泳我誦見公心楷模性情正救瑄
雖云非其意實孤勁一躡不復收驂騶終遠屏有語不
忘君愴怛忠愛盛飄泊蠶叢間櫛櫨長鑱柄路阻豺虎
多身傍干戈橫燦燦浣花詞磊磊夔州詠百年歌獨苦
斯語淚如迸放舟夷陵後潦倒春華競天困萬古胸抒
發鴻濛性陶冶不可窮世秉詞伯政讀之淡數旬高齋
風雨併旣哭復還歌枕藉以爲命斯人竟已矣慙焉心
如柄

讀李太白詩

三謝與鮑庾江左稱獨步太白更絕塵汗血如飛兔擲
筆振金石有文懸瀑布萬象羅胸中百代生指顧是氣
曰浩然不祇爲章句沈香亭畔詞諷諫有微趣奴視高
將軍才人詎能慕羽翮落九天挂席逐烟霧留滯東魯
雲躋蹬采石路我思汾陽王再衍晉陽祚云誰識此人
青蓮慧眼故無知功未酬夜郎竟遠戍璘也實蠢愚偶
而被籠箴龍章與鳳姿豈若爭食鶩古今稱謫僊斯言
良不誤黃金如可成須並子美鑄

夜醒

春夜宿齋中睡醒覺夜永呼童然膏炷四壁有餘燭長

安百萬家悄如太行嶺犬吠時復聞積雪起空冷耳目
俱寂然中懷獨耿耿乃知喧闐地未嘗無真境不必聞
晨鐘遽然有深省

選唐詩清覽集作

鴻濛啟元運靈淑鍾人紀喜起肇賡歌風雅隆周祀漢
魏有升降六朝多綺靡卓哉真觀君世濟擅厥美磊磊
富瓊枝豈惟杜與李歷下重格調竟陵采幽旨遙遙古
人心笙竽若隔耳大道已曠邈澆氣顧莫止鎮以中和
音萬物返其始

夏日感懷

富貴多磨滅貧賤亦支離人生天地間倏忽如飈馳曾
陽不可倩誰能挽西曦惻惻烈士心常恐智慧衰榮名
古所尙修業當及時

好鳥在樊籠不能翺與翔哲士沉下僚焉能遂廣颺仕
路多高足援手藉金張歲星照金馬執戟甘爲郎叔夜
遇非時多才反致殃至人有愚色盛德貴深藏卓然大
易訓知柔亦知剛

瞻彼庭中樹韡韡有光華秋霜未及濡零落頓堪嗟物
華誠有時吾生亦有涯澡身嚴夙夜比德耀晨葩懔懔
君子願徒聞咏蒹葭

岵岵不可涉舊廬且關心年未逾不惑白髮忽來侵蟪蛄鳴高樹霞氣變遙岑感此懷怵惕中夜起長吟終當脫丹黻撒手赴長林

少者日以長長者日以老韶年高第人倏已爲枯草世謂運推遷非人所能造抑知物亂真自損致伐天欲以駐顏顏安得安期棗寡欲而節食庶可延壽考

泝原有高士槐濱有達人東西雖一舍無異比屋鄰負才各不羈素業自相親絕巘同攀眺孤潭共垂緝畢娶師尙長躬耕慕子真嗟哉出處異而我失其淳倦鳥思故山有巢在荒榛時因晨風發良懷佳句新

宇宙日以新文章最汗漫諸子各簞鼓百家若河漢自
非卓犖識珠沙孰能判嗟余束髮時受業觀爻彖四十
竟無間坐惜光華旦嘗聞聖人言約禮斯弗畔庶用警
餘年勤補拙之半

送胡世其歸贊皇

子爲大賢後郊外有名園賜書滿鄴架十載閉柴門披
褐來邾下相見多嘉言言亦何所道但云山中好白雲
鼎庭除花落常不掃聞之怡余顏忽復傷懷抱歲寒凋
萬物今已生春草五行暗鑠人盜之而使槁若不谿雙
瞳金石焉能保子歸待竹林明月紛浩浩余將拂衣去

抱甕以終老

示勦嘉二子詩

吾年五十餘氣血漸衰老爾等業未成使我縈懷抱長
者頗知書歐李筆法好次者畢論孟未知敷文藻老子
復何爲日日東華道豈不念鄉閭林園多茂草欣逢日
初昇海內未襁褓歲值丙午春天賜豐年造倉鵬鳴黃
桑麥秀發歧早秋禾徧郊原水田足香稻吾將歸乎來
高歌問瀛島

秧歌行

鳳陽婦女唱秧歌年年正月渡黃河北風飛雪沙撲面

夔夔腰鼓自婆娑衣衫襤褸怕在首自言出門日已久
前年壽州無雨澤今歲泗州決河口父母生我亦嬌姿
藏深閨學絡絲織成合歡鴛鴦被嫁與輕薄年少兒
少年輕薄習賭博日日倡家醉平樂妝奩典盡鬻黃金
公姑頭童齒已落我唱秧歌度歉年完卻官租還種田
南來北往如飛雁如此艱辛定可憐

畫鷹歌爲相國金先生作

氣應少皞爽鳩氏勁翮森竦勢欲起人言此是海東青
飛過碣石三千里三千里外集橫木虞人巧計相羈服
一朝獻入長楊宮日食大官庖下肉華絳金環逸氣生

厓如銀鉤足枯荆尾疏臆濶目常側雄心慘淡若經營
伏盡秋高商飈發翠華雷電動雲闕獵師相將始山籠
礪吻下韞色若艷草枯木落狐兔竊凌霄一縱搏飄颻
須臾酒血滿平地龍媒照夜競鳴鏐功成歸來振毛羽
恥與燕雀同儔伍畫壁猶令凡鳥驚丹青仍貯雲臺府
君不見祝融之精爲鳳凰五德似箇羽蟲王千年一見
煥少章驚鳥自古比忠臣周之尙父稱鷹揚閔天散宜
思爽同翔翺

秋夜行

寒風一夜悲騷屑萬木蕭疎晚秋節白雲在天鬱不流

梧桐半死芙蓉折畫堂張宴鼓青絲霓裳六么相閒之
美人二八顏如玉目成心許恨別離恨別離兮可奈何
我今作歌爲君歌

燕歌行效曹子桓送田髯淵

燕山吳水路修長離筵絲竹發清商古人遺事空斷腸
一語知心誰能忘黃鶴千里自翱翔不能奮飛白雲鄉
春寒陰雨忽高涼佳人欲爲公子裳天涯回首一徬徨
今夕何夕幸同堂置酒臨風嗟未央長歌忽下衆星光
高車駟馬如履霜懷憂不覺鬢毛蒼良平事業漫相望
殷勤執手賦河梁

九日集樸園

移尊登小閣雲物晚來清
烟外疎砧落霜前白雁橫
寒山吞暮日流水涵孤城
憑眺悲今古長吟賴友生

送友人南歸

山色猶如晉游人欲向吳
輕鯨浮淺渚高鳥下平蕪
澹秋雲沒荒荒白日徂
亂峰戴古驛征馬正踟躕

平定道中

匹馬行將夕雲烟處處多
霜輕花再發淵山水能波
山險原連塞關巖尙荷戈
中宵聞雁唳起舞自婆娑

過定州觀雪浪石

不有坡公識誰知雪浪名鴻濛歸片碣江漢入濤聲勝
蹟金元變奇懷涕淚橫地經百戰後瓦礫滿山城

寄高溫如官閤中

來往三巴路王程計幾千千戈依戰壘涕淚見人烟白
日烏鵲聚高原豺虎眠家書三月少秋月正孤縣

追送山髯淵

數日勞鞅掌悵然君遠行飛蝗殘晚稼積雨黯秋城前
路龜山蔽孤舟吳月并華堂有醴酒誰與聽啼鶯

贈范動吉世兄歸虞城

跋涉將千里青燈叙舊言高堂垂白髮生事葺荒園菊

向新枝吐人憐亂後存當年後樂意此去更須論

和霍龍淮游娘子關水簾洞

林下多幽事秋游娘子關濃花開洞口老樹接溪灣瀑
起空中月猿啼雨後山丹邱應不遠乘興好躋攀

壬子冬日在鎮城作

妻子知爲累驅車到郡城風寒催老鬢日短下前楹俗
薄交游少人閱書卷清向來存道眼今日倍分明

過傅掌露太史曉園

自有滄洲意蕭然三徑清藉花能醉客坐樹不妨鶯著
述淹風雨交游念死生濁醪君不惜一晤一回醒

喜辯若弟至都

二載昆朋隔樓樓未得閒有懷期對語相見一開顏秋
色移河漢鄉思落故山惟愁歸計迫獨挾碧雲還

春日憶山中園林寄諸弟

雪霽長安道風吹游子顏高齋春不暖獨卧夢常閒古
樹家寒鳥晴雲鎖故山同胞應念我何處下松關

題田鄴洲水西草堂

勝事繼雲林幽居傍水潯江天浮樹杪峰色下庭陰人
有元龍氣歌成白雪音穀城石可祀藜杖許相尋

贈殷伯巖

不作淮南令歸來事桔槔名山多杖履田舍有風騷爽
氣虬鬚動清言河漢高卜鄰曾有願終共隱蓬蒿

游西山桃源洞

何人移植武溪花石徑盤回靜不譁靈洞千年藏日月
幽巖一曲抱烟霞因收橡子來猿窟貪看雲峰見鶴家
回憶當年燈火處依稀篆草護籠紗

野鷄舖

寒飈發動秋波終古風流與恨多荒冢魚燈沈寶玉
平原馬首躍金戈天心混混蠡探海客路茫茫公渡河
起舞聞鷄成底事不如青笠伴漁蓑

和楊猶龍

幾回蕭索歎淹留
碣石蒼蒼雲物愁
三載珥貂真續尾
一書曲突恥焦頭
居因地僻心常息
話到山深暑欲秋
嫁娶未諧禽向約
乘槎天外負奇遊

彭城放鶴亭

雲龍山下茅亭址
天外修翎何處來
一水勢從西極下
千帆遙指海門開
斷蛇事業餘荒草
戲馬悲歌賸古臺
卻憶當年蘇太守
清風琴鶴共徘徊

醜蕪芝麓涑酒和韻

易州城下黃金臺
流水釀爲竹葉醅
御苑鶯啼猶閉戶

晚春花落且銜杯登樓屢欲衰
王粲衣綵方思戲老萊
文獻中朝推雅望五湖烟艇可能回

和別寶坻柱純一相國

版泉南渡近恒山卻望彤廷豹尾班
自是長卿多卧病非關白傅愛投閒
當公綸綍憂勞日愧我雲霞縹緲間
此去杖藜尋藥餌何時容傲覲

天顏

和紀伯紫

鍾山醉老太平春自與雲霞道氣親
三代尙存惟我輩百年獨步見斯人
久居深巷辭華轂恥向侯門吐錦茵
高隱從來思濟世殷勤屬我作良臣

秋杪赴臨城別墅

鴉鴿井邊荊棘堆
路人遙指漢王臺
纔登高處晴峰見
漸入深林爽氣來
懷古樓頭宜對月
息波亭上好銜盃
當年戰壘今何在
韓信陳餘盡草萊

小亭新成猶龍晚過納涼卽和前韻

擬藏萬卷落新成
知己相看一笑迎
世上何人敦古道
天留我輩作狂生
菜根饗頗非兼味
疎月投懷豈世情
聞說西南烽火急
憂時直欲請長纓

述懷

終古雲山一望中
幽棲常欲蹈冥鴻
興亡世事同蕉鹿

得失虛名付楚弓蓮社豈能邀靖節醉鄉且自效無功
年來高卧層臺下靜對春花幾樹紅

猶龍與文衣詩有夜雪打空廊之句文衣和之余

步其韻

夜雪打空廊梅花牕外冷寒香初放時高韻何人領
夜雪打空廊迷卻天邊樹孤舟一釣翁自識江干路

秋獵南苑

玉靶雕弓斜控鞍箭如鵠叫萬人歡儒臣後騎承

恩寵指點黃羊親與看

蒙

恩賜馬

權奇名騎錦雲韉從獵踟躕過古阡新出宛羣猶戀主
驕嘶不敢下金鞭

漫興

索米長安衣帶寬故園春草路漫漫夜深忽作梨花夢
誰倩宮中賦曉寒

涿州公廨中古槐

王謝堂前燕已飛西京禾黍幾歔欷行人若問興亡事
古樹年年對夕暉

居真定夜聞鐘聲

病久支離學懶慵每逢山水喜相從卜居真定原無意

愛聽開元寺內鐘

魏象樞

象樞字環極一字環溪蔚州人順治三年進士
歷官刑部尙書謚敏果祀賢良有寒松堂集九
十二卷

四庫全書提要寒松堂集九十二卷魏象樞撰
象樞平生立朝端勁爲人望所歸講學亦醇正
篤實無空談標榜之習文章樸直亦如其爲人
惟其子學誠編此集時意在先人手澤一字無
遺遂細大不捐幾盈百卷
未免有榛櫟勿剪之憾耳

繼輔通志象樞授給事中疏凡數十上大著風
節以吏科常大計陟廉黜貪計典肅清尋以事
左遷以馮溥薦起御史知無不言累遷左都御
史振肅憲綱中外嚴憚進刑部尙書引汲黯故

國朝畿輔詩傳卷二

去

事請辭奉 特旨加尚書銜仍留原任授
刑部尚書治獄嚴明未嘗稍有縱釋後奉

命巡察畿輔糾貪除慙百姓稱快象樞在臺
省兢兢以汲引爲已任所舉湯斌郝浴陸隴其

于成龍輩皆
爲名臣鉅儒

測海集順治六年環極爲吏科都給事中時言
官吳拜吳達以言事論死囚疏論言官失言之

罪不過處分處分當付吏部貪贓壞法挾怨報
仇如是等罪乃下刑部今以失言而問大辟何

以處貪贓壞法挾怨報仇者請嗣後分別重輕
著爲成例此言路通塞之大關也有旨報聞

又言 上初親政宜愼起居不當遠出又因
災變上言語侵權貴尤切直聲震朝野十一年

大學士陳名夏得罪 詔責言官不先舉劾貶
光祿寺丞乞歸養母母喪服除以馮孔博薦再

召爲御史康熙十七年授左都御史明年京師
地震時明珠索額圖執政以利權相傾各樹黨

排斥正人朝臣無敢言環極請對陳二相挾私
罔上狀明珠等皆惕息尋遷刑部尚書以病乞

去

王士正池北偶談康熙辛酉二月上謁

孝陵諸公卿三品已上皆從多賦詩紀

事蔚州魏公環溪一詩極令人感動詩曰薊門

西望望皇畿共侍盤輿展謁歸禮罷

老臣將去填溝壑何日重來拜翠微廿載承

依子謂五六句最沁人心脾

沈德潛別裁集公為本朝直臣第一彈劾必

匪人如余司仁劉顯貴程汝璞是也薦引必正

人如湯文正斌陸清獻隴其二公是也任都御

史時特命巡察畿輔攘除尤見風力歸

田後書數千卷外無長物嘗笑曰尙書

門第秀才家風又可想見其清節矣

紅豆樹館詩話敏果以益都馮公疏薦起用清

操峻節有聲臺諫所為論事薦賢諸疏皆敷陳

剴切具古大臣風度嘉慶五年睿皇帝

詔求賢良後裔公六世孫煜以寒松堂集進

上覽奏疏稱善謂居諫垣者當以爲法
賜燬舉人先是集版燬于火至是始重刊

行世聖世不忘者舊恩禮優隆

固爲超邁前古而公于數世後猶能上荷

主知賞延于世亦

其公忠侃直有以致之也

巡行過北平登孤竹堂望夷齊廟有感

孤竹何崔巍兩裔高千古仰止夢魂間有懷常欲吐安

得涉山巔辦香頭一俯告我希聖心難濟蒼生苦凜凜

對簡書汗下渾如雨此行負朝廷愆尤何日補遙望

乞神靈相助驅豺虎灤水自無波澄清在
畿輔

剝榆歌

黃沙日暮白村路燈火盡絕泥塞戶路傍老翁攜穉兒

手持短鐵剝榆樹我問剝榆何所爲老翁倚馬哽咽悲
去歲死蝗前死寇數十村落無子遺蒼蒼不恤儂衰老
獨留餘生伴荒草三日兩日乏再餽不剝榆皮焉能飽
榆皮療我饑那管榆無衣我腹縱不果且教我兒肥嗟
乎此榆贍我父若子曰食其皮皮有幾今朝有榆且剝
榆榆盡同來樹下死我爲老翁頌 丹綸免貢蠲租十
道使而況 天子軫遐邊九閭胡云隔萬里長歌
願告鄭監門繪作流民圖一紙

我友篇

我友我友武承之雙眼洞徹骨清夷衫履翛然望而知

胸中都無俗可醫昔年定交杵臼時人曰疏狂儂不疑
俯視帖括如小兒漢魏以下非吾師相與正字或補詩
一聲一律齊鼎彝甘使寶家號阿癡絕口不言方朔饑
前歲過爾舊下帷看我十年好鬚眉去歲走筆問爾著
行藏料爲季主窺茫茫世事說何爲騎驢來泛故人卮
向儂不喜亦不悲但言魏子乖時宜 天王明聖
誰能欺勉哉勉哉慰老慈聞君言執君手吾愧諍臣識
諍友世上文章輕敝帚今古幾人三不朽秋老天高此
君偶我輩對之差不醜肝腸如雪膽如斗

循吏歌與張開有

君不見人藉柔茅水歸壑慈惠不深俗易薄又不見牟
牽則卻驅則行峻法徒滋飲食爭漢庭多少循良吏政
教盡然得其平張子開有本長者二十個儻三十雅自
從謁選入承明堅樸渾如金在冶相見曾云嚼菜根俯
首雪涕就我言幼服庭訓矢清白躊躇反慮辱師門近
日蒙恩殊不少召入太和瞻 天表尾附諸臣賜

宴歸金盤玉盃香繚繞異等忝廁分榮名何以副之心
忤忤男兒學吏女學婦得無一指臨蒼生愧予難悉作
吏苦爲嘆今人不如古古人愛身今愛官此身一失官
何補以爾素性甘清貧滿眼瘡痍繫爾身榮辱得失天

所主安肯攫民媚他人民乎民乎盡殘喘頻年水旱多
展轉功令初嚴匿逃家生怕吏人驚雞犬棗壤况復接
二東邇來大盜勢難窮鈴柝夜聞城市肅狐鼠乘隙不
敢訐諺云賈人有牛庖人割用剛用柔吾自掇佇望循
聲滿恒陽傳中猶紀真衣鉢初志如山不可奪

呈孟心亭督府 陛見回任

督府從龍彥三邊叩 闕臣蒼生勞白髮紫塞斷青燐
不有麒麟畫焉知鎖鑰人當年兵入晉談笑大河濱

生日感賦

無家吾有賦五嶽是誰家歲月蕉藏鹿文章筆畫蛇一

官僮僕累寸舌友人嗟寂寞邯鄲枕居然護碧紗

富平李天生至蔚以長歌來見卽贈

讀盡書千卷知君有夙根平心搜理窟老氣逼詞源
既見眞如醉何時進一言歸家須努力經史待評論

抵蔚

依舊天涯子家鄉只暫過一官勞日月雙淚出關河
市井黃塵暗親朋白髮多不才應瓠落強仕復如何

見母

十年離故土今日傷庭萱嘻笑偏多淚風霜不忍言
幾番憂仕路口賴家園解得高堂意投簪亦

聖

恩

入都訪孫退谷王敬哉兩先生

上國推人望高風四海知
重來瞻泰斗並卧想龍鵬
重道尊儒日徵文考獻時
願將真學術還慰聖人

知

贈劉千里

兵火連江漢高人獨布衣
乍銜

恩詔出仍載異

書歸上國驚王粲中原想陸機
佇看雲壑業不是宦情

微

訪趙錦帆比部

淹留不敢問醉後淚雙垂作賦才難量爲郎宦獨遲春
雲孤少室客夢老燕支最是元龍輩交情若有私

懷汪鈍庵編修

應召身猶健歸田志已堅時清容閉戶道大在編年
松菊雙蓬鬢乾坤一釣船名山千載事歲月正悠然

答贈朱山暉觀察

十年松菊好栗里卽吾師白髮愁何益青山問獨遲蕭
條高士榻索寞故人底欲逐歸飛鳥從君借一枝

訪畢亮四同年

門前如太古客到始開關猛覺烟霞近猶非竹石間奇

文開奧窔道氣豁堅頑此夜無秋夢應從悟後刪

晚行過白登

泛泛征車暮搖搖北雁過沙吹邊草急樓鎖戍雲多好
夢歸楊柳鄉心隱薜蘿千年遺漢蹟一夜轉悲歌

雁門關述所見

邊氣春猶勁關門草未生荒陂存漢廟古塞繫羊城徑
曲隨人轉山高覺馬輕九龍亭上字石斷戍雲橫

陳公朗同年爲題可亭額賦謝

客從亭子上偶爾命名時一字行藏錄千秋道德師簷
孤分月小竹瘦得烟遲欲待中郎至清宵笛共吹

送申隨叔太史假歸兼訊鳧盟觀仲

一卧蘿山鬢已華喜從京國問烟霞
廿年兄弟真吾友一代文章幾作家
大業忍辭青玉案宦情多在碧雲涯
故園叢菊應無恙共看長天雁影斜

送衛邵孫少司馬養病歸里

景明山色入烟霏

景明山屬曲沃

十載金門說翠微

朝右不

回三晉望斗南今見一人歸
詩成報國枌榆舊酒熟看
花筍蕨肥付託蒼生難
弟在祗宜高卧掩荆扉

贈張行源

行源尊人九萬公以新喻令值金逆之變罵賊
不屈賊手刃之妻妾弟媳皆遇害時行源隻身

扶櫬艱阻備嘗萬里無恙余與
行源官光祿聞頗悉散爲賦之

先世幽光迴不回
蓼莪聲斷也哀哀
半生血淚雙孤盡
九死風濤一櫬來
人識忠門多令子
天教寒暑老中材
應思他日酬
恩地清白還從節烈開

朱山暉兵憲問病榻前志謝

文園寂寂病何如
篋裏曾無封禪書
北塞歸河空灑淚
故人風雨一停車
中原拙宦潘生老
下里狂名阮籍疏
一自使君來上谷
風流還記五雲初

觀移寺尋讀書舊居題壁

空山依舊是元都
此日登臨興欲孤
樓鎖烟霞千嶂合

門開風雨一僧無
蹊花照眼愁人老
澗水烹茶問客逋
惟有讀詩亭子在
可容一枕卧狂夫

至蔚有感

冉冉征雲片缺孤
停驂聊問季鷹鱸
狂名盡改當年舊
諫草全焚一字無
病後妻孥翻易擲
亂餘城市總堪圖
何時乞得青山許
任却烟霞老壯夫

命

時捧詔事竣抱病將北上復

送王蓼航年兄歸養

拾取烟雲半篋輕
嵩巖卜築豈逃名
十年浪送之官友
一輩初言侍母情
未許參軍忘舊舍
已同司業愛諸生

君歸尙有天涯子不是離羣淚亦傾

送少司寇張東山先生養病歸里

同是天涯卧病身送君歸去忽沾巾
少年兄弟今餘幾九列功名合讓
人夢裏青山仍素業風前白雁自
勞臣社中諸老如相問爲道疎慵
復下陳

輓李少司寇慶餘先生

孺慕百年還涕淚幾回堂上拜吾
家傳聞易簀呼丹陛但欲抽簪謝
白麻無愧平生書數卷可憐客路
鬢全華延陵一見終相許不爲先
生報木瓜

都門贈田髯淵次韻

相思日日問籃輿杖策驚聞傷玉除乞米漫投顏氏帖
買舟應載鄴侯書何妨世法周旋少轉以交情會合疎
百尺樓頭豪氣在無門更肯曳長裾

哭湯元子

館舍蕭蕭白日寒忽驚箕尾去長安九年甲榜終身事
五月中書一命官却幸生兒能記誦可憐先世倍艱難
才名寂寞湘江冷數卷遺詩不忍看

病中和胡東甌年兄見懷韻

彭澤去官曾五柳司空歸老又三宜況因消渴文園日
更得逍遙白社詩上谷停雲真漠漠蘿山新雨正絲絲

范家雞黍還相約記取金門刻燭時

答馮廣文訥生

蕭蕭三徑賦歸初誰道吾師漢二疏竊祿中朝慚肉食
移家南郭趁園蔬連年賸有安身藥舊日曾無薦士書
問罷高堂何所事手研丹墨註蟲魚

弔周將軍

大呼高帝出城闔三百年來此一身帳下投醪多戰士
軍前拔幟是孤臣裹尸不愧真男子擐甲曾聞有婦人
若使將軍猶未死彗芒那敢近中宸

送季天中給諫徙上陽

掖垣封事下秋官責爾疎狂敢自寬臣罪尙餘千古憾
主恩猶賜一家安廣陵雲起遲遲望鐵嶺風高
細細餐直北六星何處照老親終日倚門看

哭魏昭華先生

昔年乍去身猶健昨夜空山萬里魂海上鱷魚騎白日
庭前鵬鳥下黃昏遺書暗灑孤臣血垂死仍銜
故國恩最是聖朝容直諫許君骸骨葬平原

國朝畿輔詩傳卷一終

國朝綬輔詩傳卷三

長洲陶 樸 吳 輯 江都汪喜孫孟慈校

賢選奇

選奇字德邁號松濤大名人順治三年進士歷

官安徽徽寧廣德道有倚雉堂集十二卷

四庫全書提要倚雉堂集十二卷賢選奇撰是集
爲其友賀應旌所編凡文五卷詩八卷詞一卷

倚雉者其所

居堂名也

大名縣志選奇明戶部主事如蘭曾孫知府星
子順治二年舉人三年進士授戶部主事七年
督餉上谷時設三省制府駐大名而餉司設於
易水有欲以糧餉卽本地交兌者選奇力爭之
以申職掌八年榷蕪湖關清白自守嚴條約禁
羸羨風駛難泊者宥之關南陸路負擔沿行有

司設關巡察遴奇概除商民便之憂歸十四年
補戶部山東司郎中奉命督漕知漕弊

由交兌後時盡革其弊漕政一新十五年出爲

江南潁壽道僉事時霍邱賊倚山爲窟蔓延不

能制遴奇鼓舞鎮將協力征剿驅驍騎入深谷

直搗其穴連戰斬其魁降者八百人海氛擾江

寧嚴爲警備江北恃以無恐十八年缺裁改補

撤寧廣德道檄有豪姓恣爲不法廉得其狀立

置典刑風紀肅然以齋奏北上道病移疾歸

遜奇和易坦直與人洞傾底裏無妄言人服其

真誠宗族故人有來告者皆遇之厚歸

數年卒年五十四子曰嚴敘州府知府

孫奇逢序松濤宦游不廢吟咏恬退田里益肆

力風雅寄情託志往往在黜名富貴之外

劉體仁序公性正氣和經緯大政不露崖岸出

其緒餘蹴踏文園於古詩得其樸雅於近體得

其簡遠其至處往

往與元次山抗行

孫郁序先生本乎性情發於吟詠近體高偉雄

渾與開元大歷諸君子分路揚鑣古風尤飭氣

萬狀橫絕一代遠當嗣響漢魏
近亦與陳拾遺李崕同相伯仲

雜興

幽谷出佳人肌骨若冰雪臉際有芙蓉眉端生新月東
鄰宋玉窺三年未一瞥堅貞不嫁身豈容鑽隙穴十五
充後庭六宮無與埒誰知寵生妬君恩中斷絕長門一
步地有如河漢隔古風日以衰王化日以竭但貴桃李
姿不貴松柏節

鵠鷹具利爪攫物厲秋風使不逢狐兔亦與凡鳥同丈
夫當無事何以異凡庸邊徼忽多故擐甲效從戎靈鵲
化金印旗纛建交龍銘勲膺上賞晉爵列侯封平時論

豪傑管樂亦無功

張子房

秦皇如虢虎士民遭毒螫力士一狙擊天下遂大索雖
曰報韓仇無乃類劍客佐主平函夏帷帳常畫策奇謀
蓋羣公英風挫項籍能忍成大謀終遂興漢業一時多
奇人似爲子房設後有四老人前有一黃石

游白嶽

八月中秋豆花雨雲巖草木猶媚嫵青天萬仞插芙蓉
瓣香叩齒禮真武石壁變幻若龍虬伊誰鑿闢曰神斧
不信人間有帝閭星辰歷落手能數小輿直上日亭午

側身東望雲如縷我生已徧燕吳山茲山去天不尺五
逡巡石磴步天梯當關虎豹狎狎怒天生異物守門庭
駱駝獅象勢俱俱蓮花鬘秀衆峯出巋然瓊宮與玉宇
背枕玉屏摩雲霄紺殿金鼎篆煙吐五老壁立不記年
三姑對峙自今古龜蛇列宿左右纏手汲飛泉飲石乳
傲吏逃名尋丹邱何如此地修靈府歎黥從來山最奇
不說峨嵋與天姥

題劉松年岳陽樓畫

丹崖蒼壁江南有數年相對亦非偶岷江浩浩萬里來
予昔泛舟在京口一時謝政歸故鄉惟見浮伾與濁漳

雖然素有向平志但苦千里難裹糧少文卧游亦可人
安見畫裏卽非真家無米家書畫船揀得舊本劉松年
岳陽樓比黃鶴樓懸來滿室生雲煙我開樓在瀟湘之
尾洞庭口下有長江蛟龍吼有時風靜水如練君山一
點在兩肘湘女梳頭對明鏡水光山色入戶牖黃陵廟
裏人烟集西邊欲落扶桑日萬艘千航泊江頭洞賓飛
過人不識一一傳神阿堵中惟有范老一記畫不出

飲酒詞

天上月出東渤海清光乍圓還又缺枝上花堆鬢鴉容華
轉眼委泥沙朝天燭夕老醜綠髮朱顏豈能久落日沉

良夜深沾酒莫惜囊中金終日醉貪卧嫌安能束帶見
小吏綠蟻香琥珀光一飲須盡三千觴陶淵明阮步兵
呼之欲出爲我朋

貞婦篇

有姊有姊適楊氏年方二十夫君死哀哀寡婦多辛苦
之死靡他恒自矢楊氏占籍舊元城舅氏成名曾出仕
一朝罷官卽捐館室如懸磬何所恃夫君亦是青雲器
不料一疾竟不起日夜籲天願身代孤兒呱呱泣不止
誰知孤兒竟不育皇天降禍伊胡底因此家計愈艱難
伯氏析箸不我以形孤影子再無人朝夕惟一赤脚婢

廿載因依在予家去年予亦歸鄉里相見感傷交淚流
涕已垂白頻落齒代買薄田供饘粥憂及宗祧立猶子
吁嗟乎古來節婦亦多矣或得舅姑憐或爲伯叔喜或
際豐裕饒甘旨或者膺 褒封雲冠霞帔光桑梓數者
皆非所以論吾姊寒衾孤幌數十年良人黃泉日待爾
吁嗟乎丹崖之松高千尋歷盡冰霜常如此南山可移
海可填節婦之節不可徙予悲後世久湮沒故敘生平
備彤史

登敬亭山弔李太白

大塊下墜成敬亭宛溪終古常清冷近城綿亘幾十里

奕兀屹立在郊坰一望層巒皆蒼翠方春草木自娉婷
遂隊來游多麋麇鳬鷺淺水羣梳翎琴溪仙蹟在眼前
麻姑鍊丹幾千年山川得人非偶然千秋幻出李青蓮
錦袍色似翠雲鮮豪飲猶如瀑布川白也已騎長鯨去
精靈常在敬亭巔山中芳杜年年長白也新詩字字傳
潯陽雨夜郎霧采石捉月月不顧不能攜得敬亭去我
來數百餘年後登山猶記題詩處

自來安到和州一路山巖蒼翠至溫泉寺少憩因

賦

亂山巉巖數十里羣峯如龍蠹雲起行行盤輿轉山腰

有水潺潺流澗底長江鍾阜遠勢來龍眠巢湖近相倚
青松無數如偃蓋白日雜遝走鹿麋脚踏曲盤石苔滑
黃精芝草長不死中有高人事隱棲縛茅搆屋山麓裏
倦客登臨意興嬾遙望蘭若止數里法雨天花常自飛
講習堂外石齒齒僧房寂靜白石鐫頭陀供茶兼奠紫
寺傍有泉如鼎沸熱如探湯色甚美跬步有屋四圍遮
招我沐浴水清泚傳有日光在下蒸不然疑是火龍髓
因思塵世苦煩熱如何炎歊却在水安得乾坤放逸人
探奇名山興未已

寄嚴兒家報

平安付驛使秋仲尙難回夏麥須常曬寒蔬及早栽雨
多防屋漏窗閉懼書烹節費納官稅無勞里正催

九華山

九華登絕頂遙望近黃山巖草迎眸轉危橋引步艱烟
消翠壑現風靜野雲閒峭壁夾幽澗潺湲水一灣
躡屐偶登眺雕剴屬化工水流千澗外峯入大江中蒼
翠滴仙館丹霞鎖梵宮夙懷游五嶽此地得無同

江上泛舟

夜雨滴紅樹澄江似掌平草衰孤鶩宿水退遠沙明搖
落真堪惜飄零不世情頻年常作客今又泊臺城

春日懷劉覺岸

昔我同年友而今幾箇存如君復石隱夢不到青門把
酒移山影垂竿繫月痕青青原上草何處覓王孫

夏日園居王襄璞方伯過訪

地僻人蹤少逢君懷抱開一時同解組三伏且銜杯野
鳥將雛至乖龍送雨來狂歌興未已城角晚鐘催

夏日贈趙秋水

魏比揚雄宅何勞問草堂山居才數月別客已經年雷
走千巖雨風鳴百樹蟬披襟消永日舌底吐青蓮

趙子才名重江南昨日還談詩出沈宋作字法鍾顏開

到鶴林寺今歸馬服山
惻惻別我去良晤一何艱

三月晦日作

野水滿橫塘
蘿痕印短牆
雨來旋鶴井
風急亂鶯簧
虛牖納朝霽
空亭受晚涼
一卮聊自醉
未曉尙春光

遣懷

年老鈔書讀
逢人敢醉狂
衣裳資草木
談笑盡農桑
蘿徑招幽客
山禽戀小堂
桃源隨處有
何必問漁郎

譙郡有懷

征馬長嘶古道傍
江山猶是舊斜陽
但看飛蓋稱才子
詎料當塗竊帝王
細雨斜侵羅襪冷
春風輕颭菜花香

千秋欲弔奸雄蹟野雉空飛過白楊

壽春署中雜咏

八公山上列連營千載如聞草木聲投水無鞭驕晉壘
賭棋有屐卻秦兵荒邱漠漠孤猿嘯落葉蕭蕭旅雁鳴
勝地名賢兩寂寞白雲蒼狗幾回更

宿江寧鎮

江寧驛口暫停旌又是天涯幾日程漁艇晚炊烟乍起
疎星漸落月初明鳥啼簷角飛無定風翦林梢寒有聲
伏枕不堪思往事殘燈獨坐夜三更

送張九達之揚州

少年曾逐五陵豪
寶馬霜蹄金飾刀
詩思清如淮海月
文瀾驚似廣陵濤
邗江古渡宜秋草
瓜步芳洲倒濁醪
二十四橋遊獵遍
而今不說有盧敖

送朱汧朱歸滑州

壽春千里促行裝
邂逅相逢薦羽觴
瓠子河邊秋雁早
黎陽城外柳枝黃
人衝淮水披殘月
馬過梁園趁曉霜
寫罷黃庭藏客麓
知君詞賦有長楊

送曹別駕謫官還里

問君拂袖意如何
爲愛投竿返薜蘿
交道三年同調少
宦途百折左遷多
還家每讀梁園賦
挂席遙穿洛水波

高蹈自知忘寵辱春來風雨滿層阿

香山寺

招提儼屋水之西屐齒隨僧路不迷幽洞夜來山鬼叫
叢篁風動竹雞啼幾重絕巘千秋壯雨字來青前代題
百劫消磨山未改巖牆粉褪半成泥

徐子遜戶部典試蜀闈

三年顧俊貢天衢暫借司農文教敷三蜀有山連越嶠
五溪無路下巴渝錕鍔自是延津劍騁裏非同轅下駒
佇見燮風還大雅誰云滄海有遺珠

述懷

北望征鴻未寄書天涯空自負居諸草于霜後色全凋
柳到冬初枝漸舒萬事關心頭早白一身多病齒先疎
何時徙倚柴門外秋水蘆花學釣魚

夏日偶吟

沙麓城隅一草堂主人竟日可相羊晴風似酒榴花醉
長日如年燕子忙陽羨紫茶烹石鼎吳江白苧翦輕裳
柴門客少苔痕滿散帙微吟入睡鄉

讀張石龕集

張子文高四十年愜山山下葬荒阡騷魂自作芙蓉主
才鬼應登蔣蘊仙千佛有名芳外史百身無計贖重泉

精靈幸護遺編在墓草青青倍黯然

聞賀宣三新遷水村別墅賦贈

函樓久已逝波光別墅新開水一方疑是子真居谷口
恍如陶令住柴桑簾鋪冰縷消長晝盃截青荷作羽觴
何處風來偏有韻侵人花氣過東牆

玉泉山

萬泉噴湧作西湖四望芙蓉今已無寺遠僧還明月在
水流路斷野橋孤濯纓塵去一朝靜脫帽涼來竟日呼
竹裏行廚珍饌簡放歌不減舊狂奴

初夏漫成

新綠初肥草木榮
南窗枕簟暮寒生
偶然對酒心先醉
相約看花意懶行
節過梅天晴亦雨
月逢望日旦猶明
小軒浴罷渾無事
起聽西園蛙鼓聲

黑甜一夢到桃源
瓦枕繩牀樂小軒
牆角花開稱姊妹
籬邊竹迸號翁孫
蛭蛻脫殼羽初振
螻蛄鳴陰聲尙吞
孟夏良辰稱浴佛
龍華爭赴給孤園

采石懷古

茲山歷萬年
突兀起孤嶼
欲覓酒中仙
秋江寂不語

江行雜咏

雲定水停流
霞光遠可矚
一雙白鳥來
踏碎波間綠

涉溪

朝行溪水深暮涉溪水淺水性原無常人情如是轉

三山磯

芒鞋偶一到覲面亦噴哢半臂浸江水無人意寒

西子

館娃齊唱採蓮歌吳越興亡問苧羅寂寞千年烟月冷
浣紗石上碧苔多

班婕妤

猶記承恩夜未央天顏有喜御鑪香自從執扇西風急
長信蕭蕭水殿涼

綠珠

名園金谷已成塵千載猶傷石季倫有盡繁華皆似夢
至今惟說墜樓人

鸚鵡

金眸靈鳥出西河曾向潼關一度過莫怪樊籠常繫爾
能言自古譴尤多

采白懷李白

黃酒江亭解佩刀奇峯突兀壓飛濤乘舟捉月人千古
猶憶當年宮錦袍

家園小葺

新築茆扉松下開
小園蔬藥滿畦栽
虛堂四望納風雨
時有香從水面來

夏日遊敬亭山

翠雲不改似當時
載酒同官醉一卮
兩水雙橋如畫裏
座中猶見謫仙詩

秋日登鳧山

寂歷澄潭映碧空
浮雲不斷古今同
入山始信秋光老
一夜青霜萬樹紅

仙人

瑤臺十二玉闌干
夜半天階下紫鸞
說是仙人君不信

空留秋色滿山寒

田宏正

節度驕矜胎禍深
獨於魏博見臣箴
太師廟外松杉古
想見當年留闕心

盧栢

罵座名同襍子狂
圖扉猶不廢詞章
黎陽山下無窮樹
何處盧鴻舊草堂

高郵舟中書所見

欸乃漁人舉棹聲
女郎隄畔蹋歌行
桃蹊柳陌人爭渡
送盡孤帆一日程

傳惟鱗

惟鱗字掌雷號歎齋靈壽人順治三年進士歷

官工部尚書祀鄉賢有四思堂集

四庫全書提要四思堂集八卷傳惟鱗撰惟鱗有明書已著錄是集奏疏一卷記序雜著二卷詩五卷所載如更役法嚴巡方考覈諸疏及屯田苦民書諸作頗有佩直之風至士傳民語諸謠曲盡明末兵荒流離之狀然統其全集觀之則頗傷羸率蓋天性耿直抒胸臆不甚留意

於文章云

陸隴其傳尚書原名維楨少穎悟中崇禎壬午科舉人順治丙戌成進士入翰林爲庶吉士尋授編修修明史戊子典試江南旋晉左中允以直言忤執政出爲東昌兵備道駐臨清臨清當水路要衝凡大師經臨設法供應不令民輸半政齊民感之甲子山左大饑施粥設賑安集流

亡數萬人又屯田爲民累窮年芟薙卒無成功
鱗著屯田苦民書御史探以入告盡除之
特召爲少廷尉遷太僕寺少卿陞通政使甫
五日左副都御史缺出銓部未及疏名
世祖謂鱗曰無以易若卽拜左副都御史明日
上勸學疏繩繩數百言意極忠懇又密策邊海
機務太子少保靈卮地將民苦賂糧率士民具呈請
蠲荒賦得恩旨蠲糧若干辛丑補工部
右侍郎轉左侍郎旋晉工部尙書丁未春卒著
有明書四
思堂集

徵兵謠

按靈壽縣志掌雷有謠三十篇總名
士傳民語作於崇禎庚辰年錄二首

聞道羽檄下州縣徵兵補伍資征戰昔時只道從軍苦
今日從軍轉宴宴呼盧六博爭梟雉撒地青蚨常數萬

朝來郊射鬪便獵中途時得客人錢倡樓恣飲不能奈
拔刀每欲向人前主帥雖不給正餉幾敢瞋目行威權
有時聞警趨壁壘鱗鱗蕭蕭何雄偉縱使流氛高逼天
兵將常離數百里馬不勞我曰秣芻鞭箠威人如威奴
一時誰敢少撓阻割級正好獻幕府誰家有女顏色嬌
馬上常馱伴寶刀父母夫壻每追哭十里不見黃塵高
駐馬又復無營隊各人跨馬投關闕夜來宰却壻上雞
天明攜去奩中黛護防城郭尤泰然棲遲噉飲相呼譟
一人稍稍不得志百千上馬揮刀鏖在家縣吏夷如草
大噪將軍跪求好一激爲賊掉臂行招安易得服官早

喜怒何嘗不自由殊勝在室勤鋤耨爭先報名挂兵簿
駿馬驕嘶耀威武臨行惟屬女與妻隄防兵過爲兵虜

城者謠

高兮古來已云高深兮古來已云深只爲有城不固守
致令隨地賊騎侵十千長鑱鑕冰水冰刀亂割踝及髀
呼聲動地運石泥瞻望巖巖仍欲壘我築堅畧短勒限
工難完我築駛他時傾頽追起止緩兮急兮皆不可半
日無食仍負荷餓仆泥頭無一言吏來尙謂佯爲惰城
上人池內屍親戚不敢明斂葬恐責補工多羈縻死時
惟聞無他屬寄語妻孥莫向哭哭時或致城隅崩曾勞

役夫尺寸築

觀戴巖壘畫上有王覺斯先生題語

昔悟貧簪性今招山水魂有樓深寺出無路野橋存
烟裏村如溼雲流樹沒痕况逢王逸少揮灑並難論

濟上雜咏

推波風力緊隔岸紫山迎小憩依沙嘴長年狎浪聲
檣危輪餉舳旌曳護漕兵永夜愁無寐孤燈一劒清

昔載名山筆花畦時自鋤行藏山屐賸歲月壑舟虛
穉子歡旌鼓輕鷗笑簿書勞勞竟如此何日混樵漁
束帶羞彭澤扁舟愧子皮每因歸路遠益動故園思

邈雲初斷臺空角罷吹著書徒覆瓿無用在東時

朱之弼

之弼字右君大興人順治三年進士歷官工部

尙書

測海集順治中右君官給事中極論六部遇事
推委政務日弛請行試詢考覈之法累遷至戶
部右侍郎尋謫官十六年授副都御史
世祖方嚴懲貪之令得贓十兩以上者卽流塞
北右君言此令出撫按所糾必無以大貪入告
者何則一經提問有司無不求減贓罪圖保身
命雖累千萬期不滿十兩而止然則有嚴令之
名無嚴令之實也
皇上但擇撫按一大
貪者懲之擇撫按一大
奮矣十七年夏天旱因奏前山東撫臣耿焞河
南撫臣賈漢復墾荒不實歲增數十萬之賦百
姓重困怨苦之氣積爲沴厲宜加勘豁河南報

災戶部言六月內旱
皇上帝獨請蠲恤有旨
沛處處有秋何以彰德
所覆勘右君固爭以為
王宏祚力爭於朝宏祚
工部尚書又言閩民攤
以會推事象吏多得罪
日吾昨一歲四遷不以
一謫卽以無過自白乎
遂歸老于家

聞吳祭叟學使輯匡廬志詩以索之

聞道匡廬飛蓋時
閒尋圖籍費周咨
亭皋細酌濂溪水
石室親摹大禹碑
鮑謝清暉看振策
白蕪逸韻羨搗辭
憐余素有烟霞癖
展卷終期慰所思

劉鴻儒

鴻儒字魯一遷安人順治三年進士歷官都察

院左都御史祀鄉賢有四留堂集

畿輔通志鴻儒父光裕有行誼鴻儒登進士官
戶科給事中國初額賦未定吏胥爲奸派擾
滋甚鴻儒疏請頒賦制以甦民困詔從之
又條上京東鹽法語極切直其在通政有遵
諭陳言疏在兵部有開請海禁疏在戶部
有酌議錢法疏官都憲疏免述賦復論封疆大
臣不宜拘以文法隳任事之心請
飭部破例以收實效爲科臣所劾歸
紅豆樹館詩話秀水高寓公承塏宰遷安於魯
一有國士之目魯一典學八閩甄拔所及杞梓
林立洵爲不負賞識而高公去
思一碑於師弟淵源尤惓惓云

重游龍泉寺

溽暑鬱我懷攜朋尋高爽出城見南山幽况夙所賞龍

泉久神異風雨靈澤廣別來二十年老健喜重往密樹
結層陰峭壁當沆漭崕呀窳窳入薜蘿分披上躡翠陟
其巔大千指諸掌法王寶地尊霞光羅萬象景趣猶如
昔理會頓殊曩探無悟無極閱有謝有攘臨茲諸緣空
耳目餘清響留連恣遐矚浩浩神氣朗桃源勿勞思舍
此將焉訪

于嗣登

嗣登字岱仙安州人順治三年進士官大理寺
卿

安州志嗣登謙冲慈亮讀書不出戶閤順治丙
戌成進士御試特授侍御史兩閤月以

監禮 太廟失儀罷歸里居十年因薦復
官遣視兩浙監政清通裕餉報最掌河南道事
監視吏兵二部推陞補吏垣給諫轉禮垣掌印
章疏皆關大計陞光祿寺少卿壬子典試江西
得人甚盛累遷刑部右侍郎多所平反人號曰
今之于公凡爰書有不當者輒獨上一議或難
之嗣登曰此心無愧此官安足惜會更定處分
光棍例嗣登又獨主一議忤
補光祿寺丞陞大
理寺卿已未病歸卒

贈杜子靜請假展祀

楊柳春風動繡旗鴻才太史出丹墀幾年霜露懷先澤
到日山川展孝思易水征軺催驛路金臺落月映樽卮
應知顧問王程早握別何勞憶後期

呂纘祖

續祖字峻發號修祉滄州人順治三年一甲二
名進士歷官宏文院侍讀學士有几園集

過僧舍

林端梵影插秋天正在長流夾岸邊散步莫疑因病酒
偶來非是爲逃禪塵門不禁貧人履僧榻偏酣高士眠
簷際松風波底月久忘身世隔塵煙

楊時薦

時薦字仲升號賢甫鉅鹿人順治三年進士歷
官都察院左副都御史

魏裔介傳時薦宦轍所至以子惠爲先窮民無
告者施予無倦遇大兵大荒之後尤加意撫卹

不使失所愛士禮賢如恐不及而祛
積弊懲大愆毅然行之無所旁撓

搆飲泉亭

夫子之道大溥博如淵泉井養在萬世飲德及飛蠕當
時乃不遇轍蹟此迴旋停車政清冷挹注心悠然用汲
艱明王東周誰解縣我來觀遺蹤肅拜重留連高風邈
難卽匡坐想鳴絃何以寫仰止巍亭搆數椽豈惟飾耳
目亦用昭薪傳風雨永無虞勿墜告後賢

陳協

協字念蓋文安人順治三年進士歷官戶部侍
郎倉場總督祀鄉賢

魏裔介傳念蓋究心當代掌故擢戶部給事中
選禮科陞工科極言閹議一無撓避非軍國大
計不以上請定賦役俾民不重科官吏無容乾
沒開國之始謚法未定臣下靡以勸懲公請
列事蹟議之太常請當寧覈定本朝易名鉅
典自公始宣大為雄邊號饒沃自姜逆之亂城
若蹊脫已又裁宣撫與口北道公乃力言修復
之便迄今漸得生聚皆其力也他如蠲文大鹽
課之攤派譚畿輔水利之蓄泄其陳凶荒也言
竊子傭工二事最為悲痛切民隱天下雖之不
肯倚傍歸然獨立所言不抗不墜務循職掌無
出位謀其中則毅然不可奪可稱名諫議也

弔曹孝子歌

孝子名廣搃字菰昔少司馬無
山公長子以母病刲股而殞

母若病兮兒無以為情母或死兮兒不如無生兒病不
言兮恐傷母心母生兒死兮惟念之誠生孝易知兮死

孝難名嗚呼其愚不可及兮亘萬古而常存

張慎行

慎行字五從號恒菴南宮人順治三年進士官

雲南晉寧州知州

南宮縣志慎行仕山東沂水令時軍興旁午慎
行內撫小民外接禁旅儲糧餉以給軍需練鄉
勇以防草竊蚤夜拮据訖用相安戊子丁內艱
歸辛卯補晉寧安令邑僻處山隅無城池可守值
金逆甫平人心洶洶慎行選練鄉總俾庠生屠
公弼統其事癸巳正月賊驟至慎行入屠生家
傳諸鄉總誓以大義指授方畧夜半出不意攻
之賊大潰去陞昌康饒九四郡興屯同知身請
隴畝躬親勸課墾田萬頃歷官以來屢司文衡
分校山東省試得少司農焦毓瑞等六人後補
晉寧州牧致仕旋里

贈純臺李公崇祀鄉賢

鳳闕雖籌響玉珂秣陵攬轡意如何
澄清狐鼠冰霜肅
珍惜桑麻雨露多
祠近宮牆親孔孟
烟橫松柏聽琴歌
名臣還有名臣繼
駟馬高車渡沁河

張純熙

純熙字晦先正定人順治三年進士官廣東巡

按監察御史

拜主客司作

華省三年久毫無補寅清虛糜
天庾米徒抱國士情
昨日除書下又冒郎官名
因思主客職建官良匪輕

天子當有道韃譯悉來京以此柔遠服故設主
客行古名典屬國外此無紛營署小虛生白老樹撲簷
檻身閒討靜理坐聽幽鳥鳴同官多良友相見絕將迎
問余親函丈啜茗依短枰言詩尊杜甫觀時憶賈生劇
談忽已晚日暮出 禁城垂鞭信羸馬心和意俱平豈
不愛顯達拙守自硜硜

送王孟二生下第南還

吾子南歸去燕山黃葉秋暮雲煙樹遠落日大河流俠
氣看雄劍客懷憐敝裘那堪離別意迢遞故鄉樓

蔡含靈

含靈字子虛寧晉人順治三年進士歷官河南

睢成道僉事祀鄉賢

畿輔通志含靈知天台縣浙中劇寇縱橫台邑尤甚含靈甫下車設方畧出奇兵衝賊營斬其渠帥招降餘黨民始安堵擢工部主事累遷河南睢成道署臬篆纔六月清滯獄四百餘案咸服其神尋以疾卒於官

寓齋晚坐

自笑懶成癖一官今又閒客疎安用避門靜不須關睡穩高吟後涼生落照間曠遐誠有分莫強論時艱

王登錄

登錄字拱北號退修一號懷園任邱人順治三

年進士官江西永新縣知縣有梅軒詩草

任邱縣志登錄授稷山縣知縣負才明敏案無
留贖興革悉合民意姜逆變起城陷被執不屈
賊羈之守者素德公縱詣王營陳賊可破狀留
軍中督餉賊平敘功補永新縣邑荒殘人戶
逃竄登錄務為煦育
與民休息市井改觀

秋泊江上感懷

一艇江頭泊秋深水面寒蘆花全帶白楓葉盡成丹塞

雁南歸易離人北渡難那能驅百感暫使舊愁寬

烈血八軀

烈姝宋宗室女也委禽於譚生子甫在襁褓元
兵居城譚舉家匿大成殿中為元兵所執殺譚
一家以脇趙趙罵曰姑死汝舅死汝夫死汝我
不死汝歸何所遂與嬰兒同遇害血漬殿兩楹

入甌間爲抱嬰兒狀或磨煨狀益顯嗣毀輒
破壞蒙以灰沙其蹟猶表著至今不滅云

特將心匪石保此掌中珠慷慨貞譚婦從容烈趙姝詞
嚴輕利刃色厲叱狂奴血染堂階碧千秋總不渝

王景祚

景祚字振公號迂嬰文安人順治三年進士歷

官鴻臚寺正卿有用拙山房草

吳正治傳公生而警敏乙酉丙戌聯捷進士授
山西太原府推官姜瓖叛大同人心恟懼公攝
寧武道阨其吭議城守賊進逼太原時人心益
驚擾會有蒙古兵防邊撤回途經太原願供頓
以部牌至例兵馬不入城公與撫軍議以計致
之明日出師公介冑從與賊戰於晉祠西大破
之斬首數萬追奔數十里至其所據城下拔其
城賊遁去將軍將以軍法屠城公跪而請曰變

肇於逆民勝從耳活此百萬入皆將軍賜遂止
亭武饑人相食撫軍遣公賑之時寧武倉庫儲
數千石公不暇請即日發之曰活此數萬之命
罷子一人之官且甘心焉既反命撫軍疏奏報
可王辰授廣東道監察御史明年奉命巡湖
北明年補山東左參議備兵東交榆關盜起窺
城邑山東河南直隸三省會勦莫能除公標將
係維統沈勇有畧公專任之授以機宜論旬斬
賊師以獻丙申以憂去官已亥起補杭嘉湖道
庚子遷太常寺少卿轉通政使司右通政尋轉
左通政使司丁未轉都察院左僉都御史尋升
奉天府尹先是遷徙人口隸各牛泉下分特疏
請歸州縣還客流人雖有羈旅之苦而無奴隸
之辱者公之德也遠左舊不推鹽有豪商叩
關請行下公議公疏言遠左不推鹽者實有遠
慮一旦創舉恐滋後擾奉旨罷之辛亥升大
理寺卿親閱爰書多所駁正每不徇衆議持疏
上聞乙卯補大鴻臚明年請告回籍年七十卒
著有用拙山房草若干卷

送韓斗山刺濱州

鳳城雪霽氣仍寒握手長亭欲別難
一路兒童遮竹馬三刀父老望銀鞦
不愁濱海無新咏但惜燕山失舊歡
信道故人情未倦琳琅須寄百篇看